

# «Kutxabankek ahitu egin nahi gaitu»

Jose Maria Erauskin Gipuzkoako Kaleratzeak Stop taldeko abokatua da. Bankuen gehiegizko klausulen kontra hamaika auzi ditu esku artean. Hernanin antolatutako *Bankuen maltzurkeria*. *Kutxabank kasua* mahai-inguruan hitz egin zuen, eta erakunde horren jokabidea hitz bakarraz deskribatu zuen: lukurreria.

| URKO APAOLAZA AVILA |

HERRIETAKO ARETOAK nekez bete ohi diren garaiotan, Hernaniko Biteri Kultur Etxeko gelan hamarnaka lagun bildu ziren iazko abendu amaieran Kaleratzeak Stop plataformak antolatutako mahai-inguruan; Kutxabanken egoerak eta jardunak jendartearen sortu duen kezka erakusgarri izan liteke agian.

Ekitaldian hiru mahaikide aritu ziren. Javier Olaverri abokatu eta politologoak eta Julian Zapiain EHUko ekonomia irakasle eta ATTACEko kideak oso ikuspegi desberdinez hitz egin zuten kutxen banku bihurtze eta pribatizazioaz.

Mahai-inguruko hirugarren kideak, Jose Maria Erauskin, familien ekonomia kaltetzen duten eta Kutxabankek erabiltzen dituen zenbait gehiegizko klausula izan zituen aipagai, eta horiek bildu ditugu hemen. Epaitegiek baliogabetuak izan dira, nahiz eta epai batzuk probintzia auzitegiak konfirmatzeko zain dauden. Horien artean ezagunena IRPHa izango da.

## IRPH-Cajas

Hipoteken gaineko IRPH-Cajas interes-tasak berezitasun bat dauka: Espainiako bankuak kalkulatu du, baina kutxek emandako datuen arabera. Hori deigarria suertatzen zaio Erauskini: “Mailegua Euriborrarekin daukagunean, ez bankuak eta ez



Seguruenik IRPHa da Kutxabankek erabilitako gehiegizko klausula eta indizeen artean ezagunena, baina baditu beste gehiago ere.

guk ezin dugu Euriborra baldintzatu, baina IRPHaren kasuan, kutxa guztiak euren bezeroei kobratutako interesen batz besteko sinplea egiten da, hau da, interes-tasa oso altua ezartzen duten entitateak, oso txikiak izanik ere, IRPHan eragiteko gaitasuna daukate. Eta hala, Euriborra %0,5ean dagoen bitartean,

IRPHa %3,94ean dago, %700 altuago. Batez beste hilean 300 euro gehiago ordaintzen dute eta hori sekulako dirutza da, batzuentzat hil ala bizikoa”.

Gipuzkoako Stop Kaleratzeak Donostiako merkataritza-azitegi-  
ra jo zuen, salatzen IRPHa ez zela interes neutro bat. Epaileak klau-



**Kaleratzeak Stop plataformak Hernanin antolatutako mahai-inguruak jende ugari bildu zuen.**

sula balio gabetu du eta gaur egun kontrako 32 sententzia dauzka pilatuta finantza entitateak: “Jakina, Kutxabankek errekurritu egin ditu eta orain zain gaude, ea probintzia-azuzitegiak zer dioen. Pentsatzen dut presio handia izango duela finantza eta politika munduko botereengandik”.

Gipuzkoan 15.000 familia inguru daude IRPHarekin, eta banan-banan joan behar dute epaitegira, euren abokatuak eta tasak ordainduta: “Kutxabanki dirurik falta ez zaionez, dena errekurritzen du, eta horrek ahitu egiten gaitu. Orain kautelazko neurriak ere errekurritzen hasi da. Lotsagarria iruditzen zait. Kaleratze bat izan behar denean, sententzia iritsi bitartean epaileak kautelaz gelditu egin dezake prozesua, baina Kutxabankek errekurritu egiten du erabaki hori, baita irabazi ere, legediak arrazoia ematen diolako. Legalki arrazoia du, baina BBVA eta Rural Kutxak, adibidez, ez dute errekurritzen, sententzia iritsi arte itxaroten dute, baina Kutxabankek ez. Hori lukurreria da”.

### **Abal-emaileak: ahate izatetik, oilasko izatera**

Abal-emaileen kasuaz ere hitz egin zuen Erauskinen, “beste odoluste bat”. Abal-emaileak zordun baten mailegua bermatzen du, hau zorra ordaindu ezinean geratuz gero. Abal-emaileak baditu oinarriko

eskubide batzuk, baina zer gertatzen da horiekin Kutxabanken eta beste entitateen kasuan? Abokatuak oso modu grafikoa azaldu zuen:

“Ahatearen testa bezalakoa da: ahate itxura baduzu eta ahate moduan igeri egiten baduzu, ahatea zara. Bada abal-emailearekin gauza bera. Baina badago klausula bat dioena zure eskubideei uko egiten diezula: uste duzu ahatea zarela, baina ezer esan gabe kirurgia egin dizute, eta hara, oilaskoa zara adiskide! Uste duzu abal-emailea zarela eta egiaz zordun solidarioa zara. Zer esan nahi du horrek? Kutxabank zure etxebizitzarekin geratu daitekeela hipoteka eskatu duenarena baino gehiago gusztatzen bazaio. Gurasoen etxea bereganatu nahi izaten dute seme-alabena ukitu ere egin gabe. Hau gertatzen ari da, lau salaketa jarri ditugu”.

**“Kutxabankek bere kontrako sententziak errekurritu egin ditu eta zain gaude ea probintzia-azuzitegiak zer dioen. Pentsatzen dut presio handia izango duela finantza eta politika arloko botereengandik”**

**Jose Maria Erauskin**

Erauskinen esanetan egoera horrek sekulako antsietatea sortzen du zordunarengan: “Badakizu zer den pertsona batentzat gurasoak bere erruz etxerik gabe geratzea? Krispazio eta desoreka ugari sortu ditu familietan”.

### **Informazio eskubideari uko: oilaskoa putreak jaten duenean**

Kutxabankek erabili ohi duen beste klausula batek dio uko egiten diozula informatua izateari zure kreditua beste baten esku lagatzen denean: “Kutxabankek zure kreditua funts-sarraskijale bati saltzen dionean, zuk ez dakizu, informazio horri uko egin diozulako, eta hala, ez duzu kreditua baldintza beretan erosteko aukerarik”. Kutxabankek mailegu horiek euren balioaren %5ean saldu izan dizkie funts-sarraskijaleei, esaterako 2014ko ekainean herritarrek ordaindu ezin zituzten 340 milioi euroko kreditu pertsonalak –60.000 kreditu– 5 milioiren truke saldu zizkion funts bati. Erauskin kexa da, jendeak ere erosiko lituzkeelako prezio horretan: “Badago gauza bat asko gogaitzen nauena. 27.000 euroko mailegu bat Luxenburgoko funts-sarraskijale bati saldu badiozu 400 eurotan, zergatik ez diozu gauza bera eskaini bezeroari? Ez diozulako ezer barkatu nahi”.

Abokatuak azaldu zuen atzerapen-interesak %17,25 kobratzea ere “astakeria bat” dela. Legearen arabera adostasunik egon ezean %4 izan behar du, baina Kutxabankek argudiatu ohi du portzentajea bezeroarekin adosten duela: “Ez da hala izan, mailegu guztiek %17,25 badute, ezin da ulertu negoziatziarik egon denik, jende guztiari inposatu dio hori: hartzen duzu ala ez”. Klausula hori ere balio gabetu egin dute epaitegiek.

Bestalde, garaiz ez ordaintzeagatik egindako erreklamazioarengatik 30 euroko komisioa kobratzen du entitateak eta klausula hori ere balio gabea dela dio Stop Kaleratzeak taldeak: “Komisioa, egindako zerbitzu batengatik kobratu ohi da, eta zer zerbitzu eman dizute? Garaiz ez duzula ordaindu abisatzea? Ohar horrek 30 zentimo baino ez ditu balio; 30 euro desproporzionatua dela esan du epaitegiak.



Aitzitik, Kutxabankeek soilik epaitegira jo duenari kentzen dio komisioa eta horrelakorik egiten ez duenari –Erauskinen aburuz normalean prokuradorea eta tasak ordaintzeko dirurik ez duelako– kobratzen segitzen du: “Badago jende heldua 400 euroko alargun-pentsioa besterik ez duena, eta diru hori mailegua ordaintzeko ezarritako eguna baino zertxobait beranduago jasotzen duenez, hileroko 30 euro kentzen diote”.

**“27.000 euroko mailegua funts-sarraskijale bati saldu badiozu 400 eurotan, zergatik ez diozu gauza bera eskaini bezeroari? Ez diozulako ezer barkatu nahi”**

Jose Maria Erauskin

**Arazoa ez dira kaleratzeak, gehiegizko klausulak baizik**

“Etxetik kaleratzeak bankuen abusuaren ondorioetako bat dira” esan zuen Hernanin Erauskin. Bere hitzetan abusu horiek jendea pobretzen dute eta lehentasunak markatu behar izaten dituzte: “Badaude pertsonak ezer ordaindu ezin dutenak, eta kalean geratzen dira, horiek dira telebistan ateratzen direnak. Beste askok hipoteka ordaintzen segitzen dute –bankuen abusuaren ondorioz gehiegi baloratuta dauden arren– baina ez dute afaltzen edo bazkaltzen. Gaizki elikatutako haurrak daude, IRPHaren 300 euroekin makarroi eta lenteja asko eros daitezkeelako. Sukarra duzunean paracetamola, liburu bat, familiarekin askari bat... Gauza arrunt horiek ere ezin dituzu eduki, zure diru-sarreraren %90 hipoteka ordaintzera bideratzen baduzela”.

Erauskinen iritziz etxetik kaleratzeen kontrako neurriak proposatzen direnean, mesedea bankuari egiten zaio, horrela, bankua “lasai” egon daitekeelako: “Berak etxetik kaleratuko ditu beste batzuek estalpea emango diotela jakinda”. Soluzioa, hortaz, ez omen da kalera-tzea konpontzea, bankuen gehiegikerien kontrako lege bat baizik.

**Epailea prebarikatzen**

“Europa bakarrik geratzen zaigu, hemengo justiziak ez du balio. Magistratu gisa dago La Caixako sistema juridikoa osatu duena”. Sebastián Sastre ari da, Espainiako Auzitegi Nagusian preferenteen gaia aztertuko duen epailez: “AzERIA oiloak zaintzen jartzea bezala da”.

Gutxieneko muga edo zoru bat ezartzen duten klausulak ere Auzitegi Nagusira iritsi dira eta baliogabeak direla erabaki dute, baina ezin direla itzuli, horrek sistema publiko-ekonomikoa arriskuan jar dezakeelako: “Zein da irakaspena? Gutxi lapurtzen baduzu itzuli egin beharko duzu, baina asko lapurtuz gero, berarekin geratu zaitezke”.

Stop Kaleratzeak-eko talde juridikoko kideak etengabe ari dira epaileari Europatik datozen sententziak erakusten, halako erabakiak ezin direla hartu erakusteko, Espainiako legediak baimendu arren. Izan ere, Europako Justizia Auzitegiak 1978ko *Simmental* epaian dio juezak ezin duela herrialde bateko araudia ezarri Europakoarekin kontrastanean baldin badago: “Pentsatzen ari gara salaketaren bat jartzea juezaren kontra, prebarikazioagatik. Nahiz eta jakin halakorik ezin duela egin, Europak kontrakoa exijitzen diolako, jarraitzen du egiten. Seguruena elkar estaliko dute, baina gutxienez prentsan aterako da Donostiako epaile bat salatua izan dela”.



**2015**  
Txotxongiloak, ipuin kontalariak, magia, antzerkia...  
Bilboko Haur Kultur Zirkuitua | 2-8 urte  
URTARRILA • OTSAILA • MARTXOA

1/ 19	IZEBA TEKLA
	18:00etan Basurtoko udaltegian
1/ 20	IRRIEN LAGUNAK
	18:00etan Begoñako udaltegian
1/ 21	ERIZ MAGOA
	18:00etan Errekaldeko udaltegian
1/ 22	JAKIN ETA JOLAS
	18:00etan Tiboli eskolan
1/ 23	MADIBER MAGOA
	18:00etan Abandoko udaltegian
1/ 24	ANA MEABE
	11:00etan Deustuko Bidarte udaltegian
2/ 03	PUSKI ETA TXURRUSKI
	18:00etan Begoñako udaltegian
2/ 04	KORRI ETA XALTO
	18:00etan Errekaldeko udaltegian
2/ 05	TXOBORRO MAGOA
	18:00etan Tiboli eskolan
2/ 06	APIKA
	18:00etan Abandoko udaltegian
2/ 07	BAT, BI, HIRU...FESTA!
	11:00etan Deustuko Bidarte udaltegian
2/ 09	ONINTZE GOITIZ
	18:00etan Basurtoko udaltegian
2/ 12	BEHINOLA
	18:00etan Tiboli eskolan

SUKALDARITZA, MOZORROGINTZA,  
MUSIKOTERAPIA ETA SORMENEZKO  
ERAIKUNTZA TAILERREN ESKAINTZA ETA IZEN  
EMATEA [WWW.IKUSIETAIKASI.NET](http://WWW.IKUSIETAIKASI.NET) GUNEAN

Zure seme-alabekin euskaraz disfrutatzeko baliabideak sarean.  
Ikusi eta Ikasi bloga!  
[www.ikusietaikasi.net](http://www.ikusietaikasi.net)

**Bilbao**  
UDALA  
AYUNTAMIENTO

euskaitzateen  
topagunea